

## HADIS – MOTIVASI HIDUPKU

### KUPASAN HADIS TEMATIK (6) : HINDARI MENENTANG KEBENARAN SETELAH JELAS BUKTINYA

Sebuah riwayat daripada A'isyah RA, bahawa Nabi *Salla Allah alaih wassalam* bersabda:

إِنَّ أَبْغَضَ الرِّجَالِ إِلَى اللَّهِ الْأَلَدُّ الْخَصَمُ.

Maksudnya:

*Sesungguhnya orang yang paling dibenci disisi Allah ialah orang yang menentang (debat yang tercela) lagi berkeras.*

[Al-Bukhari. 2004. *Sahih al-Bukhari*, Kitab *al-Madzalim*, Bab *Qawl Taala fi Surah al-Baqarah (al-ayah 204)*, no hadis 2457. Penyusun: Muhammad Fu'ad Abd al-Baqi. Qahirah: Dar Ibnu al-Haytham]

Menurut Ibnu Hajar al-Asqalani (2001), maksud perdebatan yang dinyatakan di dalam hadis berkenaan ialah perdebatan yang cenderung ke arah perbalahan bahkan perbalahan dua kelompok yang berlaku boleh memberi kesan kemudaratan.

#### **Keterangan umum:**

Perbalahan atau pertelingkahan yang sering berlaku dalam kehidupan masyarakat dek kerana timbul antara mereka yang tidak sehaluan. Antara perkara yang menimbulkan perbalahan ialah berlaku kewujudan pihak yang cuba mempertahankan perkara tidak benar pada hakikatnya disebabkan perasaan berada di pihak yang benar sedangkan sebaliknya sehingga menonjol sikap enggan mengalah. Namun, tidak dinafikan mempertahankan perkara yang benar sememangnya dibolehkan mengikut piawai syarak tanpa mengotorkan lidah dengan ungkapan yang tidak enak didengari. Antara kesan persekitaran dalam masyarakat yang mencemarkan imej individu muslim disebabkan menentang sekeras-kerasnya sedangkan beliau berada di pihak yang salah ialah boleh mengeruhkan keharmonian sesama insan bahkan menimbulkan fitnah tanpa meneliti sebelum memutuskan sesuatu. Tuntasnya, sebagai masyarakat madani yang menjulang al-Quran dan hadis baginda Nabi *Salla Allah alaih wassalam*, sewajarnya kita perlu melaksanakan tiga perkara utama, iaitu pertama berusaha untuk menghindari menentang dengan keras sebelum mengetahui perkara sebenar. Kedua, elakkan perbalahan terlebih dahulu dan biasakan perbincangan kerana perbalahan boleh menyebabkan kegelinciran lidah yang tidak dapat dikawal apabila amarah menguasai diri. Terakhir, sekiranya berlaku juga kemusykilan sesuatu, amalkan selidiki dahulu tanpa menentang sehingga terbukti kebenaran kerana mewujudkan persekitaran yang damai itu menzahirkan suasana ketenangan.